



肆

10218

東園鄭先生文集續編卷之十一

題跋

恭題南京守備太監臣陳祖生審錄



勅諭後

仁者以天地萬物為一體必九州四海之外無一物不得其所然後有以盡仁者之量故舜繼堯而若上下草木鳥獸禹繼舜而鳥獸魚鼈咸若湯文之解網禁厲為是故也蓋萬物之氣乃吾之氣一物失所則吾氣不貫氣有不貫則痿痺而不仁矣在物且然況

於人乎臣伏觀弘治四年五月三日

皇帝勅諭南京守備司禮監太監陳祖生審錄罪囚有曰冤抑致傷和氣又曰詳察言詞旁詢知証毋惑浮言毋拘成案又曰務得實以全民命以稱朕好生之意臣紀謹拜手稽首颺言曰大哉 皇言乎仁哉 皇心乎其即天地好生之言萬物一體之心而為囚者求生道焉求之不得則死者與我皆無恨矣是故生固仁也 設之六仁心也 地所以位萬物所以育氣無不和而四靈畢至舜禹治文之治行自於人

矣臣紀何幸躬逢其盛敢再拜稽首用獻緝熙之况
恭題

宣廟御筆春草圖後序

古者聖帝明王之治天下也使草木鳥獸魚鼈咸若
蓋仁者以天地萬物為一體氣象也臣拜觀是圖然
後知 帝王胷襟浩然無際此天地所以位萬物所
以育也與且是圖作於丙午乃

宣宗御極之初十年之內物阜民安幾致刑措豈偶
然哉豈偶然哉

恭題

東園文集卷上

二

宣廟畫犬後

是物畜之寂靈善解者蓋以防虞警侮為職跳號捕
噬是其材也今乃俛首帖身偃僂伏若無所事何
也蓋 聖明之世邊塵不驚夜戶不閉亦晦其材職
以伺時而已然亦可謂吠形不吠聲也與

恭題

宣廟御筆畫馬後

國子監生臣唐凱奉所藏

宣廟皇帝御筆畫馬求題臣紀再拜而言曰天下之馬伯樂一顧價增十倍似但善識馬耳凡馬遇之且如是况騏驎負千里之良而沐萬乘濡染之恩者乎臣以是馬當無價也今四方無虞糜閑繫散固可為國家喜亦不能不為斯良惜之

題蔡忠惠公茶譜

是錄石刻原在邑坊張家予得其摹本相隨文筒幾三十年矣往歲張遭回祿石刻已灰而摹本幸存予恐其紙墨久而腐漶則先正之手澤自我斬也故梓以代焉嗚呼四賢一不肖之詩傳頌華夷不書溫成之碑有工人紀其復塘減稅造橋植樹特緒餘耳况是錄乎然君謨小楷朱子嘗稱其宋朝第一今吾邑所傳惟荔枝譜茶錄二者而已荔枝譜已刻于郡評者謂荔枝譜結構不如茶錄之精嚴點畫不如茶錄之遒勁亦或然也重君謨者不能不重於是錄

題晦菴同年錄

此有宋紹興十八年晦菴朱先生登狀元王佐榜第五甲第九十人同年錄也嗚呼紹興在宋南渡之初

于今幾四百年矣其間科甲之錄不知有幾而是本
獨存于世狀元不知若而人王佐猶見稱于今殆必
有故矣科甲果足恃耶茲以提學侍御王君明仲將
梓以示南畿士子故著之有志于斯者尚勉圖之

書清源郡侯家譜後

此宋清源郡侯陳公世譜也公生南渡高宗紹興四
年甲寅登孝宗隆興元年進士歷兵部侍郎數文閣
待制提舉太平興國宮寧宗嘉定元年戊辰致仕累
封清源郡侯食邑一千一百戶卒嘉定十四年辛巳

又三年癸未葬留坡山之麓紀昔在翰林告中曾同
其裔孫靖安司訓機展謁墓下今弘治己未復得登
拜因按譜圖追考歲月公生先予三百年致仕之年
七十有五退居田里之年十有四卒之年八十有八
歷官久故政聲譽望滿朝廷歸田久故題咏墨跡遍
鄉郡屏山去留坡未四五里故得兩謁公墓而詳公
之歲月如此因誌之以起陳氏子孫之善繼與後人
之視今者云

書陳士賢輓章後

方伯陳公士賢予同年友也公台人剛介清儉之操
海內士夫無不敬慕論者獨以爲矯激太過似乎沽
名予昔行部至台祠公于鄉賢台士亦有以是私議
之者予折之曰行善而名隨之聖賢不惡也惟有意
行善以取名則不可耳然亦必有善而後可以得名
未有無善而得名者汝但考其行之善與不善耳得
名之由奚必計焉苟行善可以得名誰禁汝勿爲耶
士議乃息雖然使天下皆公難爲聖賢之中正使天
下無公難爲世俗之卑汚然則如公者在聖門當進
之在後世當仰之嗚呼天下烏可以無公哉

跋終慕圖

予以子於父母一體而分喘息呼吸氣常相通黔婁
父得疾而驚蔡順母噬指而悟氣體流通初無間隔
人子思慕其親豈可以他求耶如吾之四體父母所
遺也則足容必重手容必恭焉吾之兄弟父母所生
也則兄友其弟弟敬其兄焉祖宗父母所尊也子孫
父母所親也則敬其所尊愛其所親焉由是充之近
而宗鄙父母遺澤之所被也則恩禮相將使其稱孝

而稱躬焉遠而天下父母之同胞也則居官臨民使
之老安少懷各得其所焉如是則自身而家而鄉鄰
而天下凡吾身之所接皆父母之可慕也又何以圖
爲哉雖然由乎中固所以應乎外觸於外亦可以感
其中古人有聞風而哭者望雲而思者則是圖未必
不為慕親之一助也

跋肅軒壽圖

箕疇恭作肅曾論仁者壽聖人之言各有所指然合
而觀之肅則整齊嚴肅之謂仁則心存而不放之謂

東園文集卷十一

六

疇之肅仁之見乎於外也論之仁敬之存乎中也非
敬無以爲仁仁者未嘗不敬合仁與敬則天宇湛然
萬境澄澈故不經不舒無鉛無汞自然血氣循軌精
神內固彭鏗李耳不足言矣東白學士肅軒之友也
其得此者最深予將與之敷此以壽天下又未知肅
軒能相從與否也

說

蒼鷹擊黃狐說

天之生物品別類分羽者飛毛者走各正其性命而

不相通蓋理同而氣異也其氣既異則形聲動息嗜惡之類皆判然不相干矣鷹以羽族而擊狐狐以毛族乃不能辯其非類而甘受何也鷹武禽也狐妖獸也武者正妖者邪邪不可以敵正况鷹以搏擊為職者耶苟見狐之妖而舍之則天下之獸皆狐矣如職何豈論其族類之同異乎已也哉雖然今日一狐明日又一狐鷹有限而狐無窮亦未見其可也然則為鷹謀者如何狐族之長有麟焉性最仁厚百獸宗之鷹若狀狐之行以訴之麟麟將有以處之焉苟號於

百獸曰吾族有狐汝知之乎汝等今見狐必搏而噬之以告於予毋使鷹之侵吾族此策之下也集百獸於郊藪伏狐於前聲其罪示以搏噬之威俾其呼群引類自相悔悟以反和而歸正此策之中也以吾仁厚之德出應王者之瑞趾角之風由闔門而及天下心正氣和薰蒸透徹俾兩間位育鍾靈孕秀舉毛之族皆麟之性山林之間欲求一狐而不得此策之最上也嗚呼此豈所以責鷹也但可以告麟尔然鷹亦不可因麟而廢其職

陳氏三子說

禮子生三月而父名之及冠而賓字之字者所以敬其名而責以成人之道也其禮不亦重乎建德邑憚陳君伯宣名其三子長洧次曰淮三曰漢冠期有差雲南憲副林君待用以賓禮字洧曰若濟蓋取濟人溱洧之義也淮曰若導蓋取導淮自桐栢之義也漢曰若宗蓋取江漢朝宗于海之義也皆未有說茲者伯宣秩滿來京廼請於予予謂以乘輿濟人仁者之事也仁雖急於濟人其本在於仁身心純乎理而無

人欲之私斯可謂之仁矣順水之性而導之而行其所無事智者之事也智雖善於處事其本在於格物致知以明其理俾方寸之間灼有定見斯可謂之智矣江漢朝宗于海猶諸侯同宗于王忠者之事也忠雖主於事君其本在於存實理於心而無虛偽以徇之斯可謂之忠矣雖然洧也仁苟未能明夫理則昧趨向之路而惑於他岐而仁無自進淮也智苟不能體夫理則私欲間斷而所知為徒知也漢也忠苟非智以知之仁以體之則斯理何由而實存諸心耶夫

學問之功必由師友以成三子於父有師道於兄弟則同胞之友也家庭之間合命名與字之義講習交資互益使所行所理皆實於己則成人之道備矣他日相繼出而世用於濟人於處事於事君舉此而措之耳夫何難遂書之以為三子終身規

贊

大司徒王公軾公服圖像贊

天之生材也不偶其處之也亦不偶昂昂司徒造化之友赫赫中丞霹靂之手其神采也冰玉之清其貌狀也山岳之厚髯掀霜雪寒氣吐蛟龍吼胃藏百萬甲兵 帝錫九天印綬屹矣李世勳之長城凜然周亞夫之細柳威望趙克國頡頏勳猷寇萊公先後中國倚為重輕外夷問其安否功銘彝鼎也常存名垂竹帛也不朽嗚呼如公之人其都將相而享期頤豈但身世之榮寔維邦家之壽

陳太常卿音畫像贊

神完氣克海涵春育背盎面晬春臺玉燭安重之態儼然可尊和厚之容藹然可掬一舉鹿鳴登金步玉

侍講 經筵從容啓沃奉常南都百神是屬歛容對
越洞洞屬屬其處已也卑以自牧其接人也不立邊
幅惠洽鄉閭恩覃宗族志在簡編教存棧樸出詞吐
句不雕不琢仕歷三朝荐沾寵渥業傳二子同登科
目人皆知公居常處順廓然有容不知摧奸折暴聞
者頸縮是蓋天之賦予者厚公之涵養也深宜其生
前也有譽有福其死後也以嗣以續

封太常博士李公畫像贊

汾山降神泮水書紳文章科甲盡付後人青衿錦服
曰唯此身我忝姻媿助寫其真

尹教授畫像贊

體之豐貌之恭乃輯乃雍禮度春容志之克學之曠
一嘘一吸文星昭灼神之愉氣之紓靡縱靡拘仙溪
師儒中之悅外之樂載瞻載噩劍州郡博

蘇巡檢畫像贊

瞿然之形其德孔良闡然之色其中日彰蚤奮志青
燈之下隨邁迹紫薇之堂握省篆觀國光分巡羅之
符精警摘之方半文半武一弛一張宋祖召還蜀中

俊傑景德封事武勇明強正風雲之際遇耽山水之
徜徉草亭石沼謝其兵甲芒鞋竹杖代我冠裳噫若
人也真可繼令尹百年全節發運使千古之餘芳

外舅黃公畫像贊

其神休休其氣悠悠不吐不茹匪剛匪柔蚤奮翮於
霄漢晚正首於林丘廣右海南德政多留龍池席麻
鄰好兩脩琴罇自適杖屨優游有子與孫克紹箕裘
嗟我外舅樂且無憂

陳經府贊

東園文集卷上

十一

其重如山其溫如玉如松之茂如蘭之郁蜚山鍾秀
泮水樂育抱藝南宮大庭首錄橋門馳聲松江贊
幕投綬歸來干蜚之麓有子有孫且耕且讀觴咏優
游萬事自足噫進則事君退則善俗而今而後仙溪後
生小子孰不仰先生之芳躅

東園年五十自贊

前爾十年孔門絕望夫見惡者適爾之年遽氏自知
其往行之非後爾四十五年武公求交戒於國噫非
孔無以勵爾志非遽無以寡爾過非武無以收爾功

爾其受戒知非以法夫人所惡庶無愧乎爾容

東園集卷十一

十三

東園鄭先生文集續編卷之十一終

東園鄭先生文集續編卷之十二

銘類

奉政大夫浙江按察司僉事孫君墓誌銘

弘治己酉春三月予行部四明傳使馳公訃至嗚咽
久之遂促程歸哭翊日其孤國子生欽奔自南都將
以還葬發引有期經杖匍匐奉江西按察司僉事黃
君九成所述事狀晉而請銘於予按狀公姓孫諱弁
字文冕先世高陽義族里人宋尚書智諒公其始祖
也數傳至銀青光祿大夫安卿公為初門令又居初

東園文集卷十二

一

門至八世祖文新公徙浮梁之官莊今遂為浮梁人
曾祖復原祖忠文皆隱弗耀父彥俊封山西道監察
御史母徐氏繼王氏皆封孺人配甯氏封孺人皆以
公貴也公生魁梧跌宕不類凡兒年十六遊邑庠遂
嶄然露頭角成化戊子以書經魁江西鄉薦壬辰登
吳寬榜進士時方慎選守令公遂有龍游之拜始下
車搜剔民隱魁宿蠹弊次第罷更之重農桑緩催督
事不後期民不識吏龍游浙聞之衝民尚賈術少業
詩書學宮頽廢生徒不檢公程督有方人知向學不

一二年廟堂齋號庖廩門路煥然一新鄉民不知之也邑人胡工部彥超錄公善政有愛民如子讞獄如神諸異績天官卿聞之起拜山西道監察御史奉

勅清理兩廣邊儲廣禠夷民難繩法律崖廉僭萬嶼海諸州二司巡守終秩不至倉庾盈縮更代楮墨而已公節至群奸輸伏邊積如山先是巡撫朱公以便宜開渠千八百里抵瓊以代海道避風濤紮歲無成耐渠才涇民力不堪公立罷之民頌載塗朱亦不以爲嫌癸卯奉命巡南圻時守備中貴鷹犬縱橫爲

聽日久莫敢誰何公首劾之人皆危公上爲之降

旨逐其鷹犬圻甸稱快蕪湖權丁七十戶舊已罷免

督榷者又私復之公悉革去揚子江已逮強徒以賂

寢案公悉廉正其罪江寨肅然乙巳以年勞陞浙江

按察司僉事公子惠如龍濟刺制如兩廣昂昂風裁

如南圻時而涵養抱負又遠且大焉初分道嘉湖郡

邑之吏偽篆撥注者三四百人悉寘于法不少貸贖

徒重足而立繼分寧紹台三郡豪右之家以亂政尅

法爲世業細民幽隱如甕而蒙也公鋤強扶弱畧無

顧忌姚宦宥兒屋妓城壕訓淫引寇民俗騷然公下
令三日塚有屋者族逮之即時復爲荒墟妓亡寇息
民生以安嚴有池王劉馬諸豪又有九龍十虎之號
稍有睚眦則杯酌一呼金革隨至曰晝衡行無敢仰
視者公患之榜示編門限旬日間能自輸者宥之過
限不至者先捕殺之且聞于朝而籍沒之群徒股
慄相率自輸者惟恐後時予亦部嚴公謀於予曰嚴
在萬山中士民囿於風氣今數姓子弟之在泮者先
生徙于郡庠以分其聲勢開其聰明如何予遂如公

策後歲餘與公再至嚴人夜不閉門村無犬吠公之
賜也尋以萬壽賀節公當行三郡耆民聯疏乞借
欽差巡視地方侍郎彭公移文獎勞民喜得終惠無
何訃至農嘆于野旅嘆于途賈嘆于市官僚吏胥咨
嗟于公庭鄉氓父老若喪所生然越數月哀不能泄
嚴民趙仲宙等聯疏因郡邑以達私如羊枯於峴山
韓愈於潮陽故事鑄碑立祠以答公恩二司未及報
催陳至再不已其功德入人之深有如此者公卒於
弘治己酉三月二十六日距生宣德癸丑某月某日

享年五十有七男一即欽女三某某其婿也是年八月四日欽扶柩而歸將以某年月日與先孺人合葬於某里某山之原嗚呼予於公生同年官同僚又行部同方且知公視他人獨詳銘烏可以不佞辭銘曰

浮梁之孫尚書之裔祁門載遷銀青是繼曰至于公西江擢桂魁星上騰禮闈登第出宰大邦民歌愷悌起立內臺帝簡誰敵憲節所臨群邪屏翳監司兩浙陽和風厲廟貌血食春秋掃祭我勒貞珉用昭千世

文林郎監察御史井菴林公墓誌銘

成化乙巳監察御史林公致政于家又明年丁未十一月晦卒于正寢茲卜葬城南寶澗山之原其孤近龍奉其內弟廣西少叅吳君昭所述事狀請銘於予予與公鄉薦同年養疾同歸疾痊同起以兄弟相視者三十有五年矣銘安可辭按狀公諱誠字貴實姓林氏唐邵州刺史蘊公之後元至正間譯史諱安者其高祖也曾祖仁嗣國朝永樂間贈兵部員外郎祖英兵部員外郎父輝永樂甲辰進士母吳氏國子

博士某公女公生二十四日喪父員外公攜育京邸甫七歲員外公亦喪公遂無依艱危萬狀人所不忍言幾弱冠稍能自植家貧無以從師每於親友處私聽講解即能通曉大義自是益自刻意勤苦忘寢食至嘔血不廢越三年浸浸有成廼授徒自給以屢經挫抑因號抑庵景泰癸酉領福建鄉薦天順甲申登彭教榜進士為迎母計上疏養疾到家旋治居室奉母以居水陸甘旨力可致者不備不止每割牲留客必先取一股以供母殺躄不具不恤也以養病養親

而歸又號曰願庵未幾部檄起拜廣東道監察御史廼迎母就養供餽竭俸入己身恒無完衣成化戊子天變抗疏劾閣老商輅舊與廢易難立清朝報罷遂稱疾且力爭前疏欲罷輅以回天變願革職以謝輅憲宗皇帝怒降旨云昔唐太宗用王珪魏徵朕用商輅有何不可下公獄官校就班執公以出公北面大呼曰姦臣擅殺諫官左右為之縮頸尋以言職得復官已丑奉勅巡畿甸陳言禁操軍攘奪以安民生董公差夾帶以蘇民困等六事俱蒙采納所至霜威

凜凜至於水利農桑庶務凡有當興當革者皆以次
罷行之以其志欲勞民勸相如井養之不窮又號曰
井庵庚寅改勅總理京畿學政條嚴肅務以敦
尚孝弟削抑浮靡惜陰有圖家政有序皆身先之不
遵教者黜罰不貸強宗豪右囑簡盈凡一不發視但
以至公行之故謗言日起而聲譽亦因之而著三年
秩滿勅贈父如其官封母吳氏為太孺人壬辰復疏
養疾遂奉母以歸時母舅某歿於官舍遺孤即今少
叅也年方若干歲公撫教婚娶視如同胞未及冠遂

占鄉魁登黃甲累員外郎至今官公力也母嘗有疾
夜禱北辰日躬湯藥體不著席者數十日母卒喪葬
一依文公家禮而哀瘠過之喪畢建祠堂於居室之
東以奉史譚公以下神主又倡興金橋之祠以藏蘊
公以下桃主歲時會拜謁講宗盟其中又立鄉社以
事土穀之神以古有先賢死祭土社之禮廼以翰林
侍講陳公用配焉性喜種樹又築圃於寶澗山之陽
荔栗橘柚梅杏之屬可共邊實杉松栢茶檜之屬
可以備器用者皆布列有章遠而玉湖又遠而石磐

稱是焉暇則乘肩輿攜壺約友傾倒終日又號曰雲山學圃癸卯疾痊還京予送至武夷宿文公精舍數日而別至京又奉勅巡按兩浙專理鹽課以地震上言修省十事而首以言路當先出京數程風中口眼扶病至泐鹽場宿弊剔刮無遺又校集鑿方刊布諸郡巡部至嘉興以學宮祭器多周制廼曰吾巡畿甸尚為豫讓立祠先師孔子可無報乎遂命工依式範之計五百餘事驛送闕里予往歲謁孔林衍聖公并其文移圖式出示予曰此林侍御之功也甲辰

上章乞骸不允又陳時政八事多有采行乙巳又上不待報即以原奉符勅差人進繳徑自泐抵家甫士大夫相與駭誇踰數月報章下特許致仕蓋知公不可留也諸薦紳高之倡為急流勇退詩章以贈公喜曰雲山之圃今始為我有矣因賦詩以自娛其目曰爇一炷香讀一卷書彈一曲琴靜一時坐啜一甌茶吟一首詩草一幅字飲一杯酒熟一覺睡又號曰九一道人公穎敏軒豁有大畧與人談論高爽雋永聽者不厭見義之可為者果決而行畧無退縮立朝

數載知無不言不避權勢退處于家事母奉先必極
愛敬嫻族子姪貧不能存與之婚娶喪不能舉助其
營築每過人家酒未入唇即起若語場圃之事則劇
論移時用是人得窺所好頗招物議然考其立朝大
節濟世雄材耳目所及指不多屈實莆中一人物也
生於宣德丙午六月五日距卒享年六十有二娶宋
氏大勝關大使孔才之女先公卒 勅贈孺人繼俞
氏南京兵部侍郎俞公從女孫 勅封孺人子男四
長淵泉蚤卒宋出次即近龍又次近豸近麟則側室
張黃穆出也女三適瑤王瑞王秀松皆宋出寶澗之
墓三窳坐某向某公告時自營也今窳公于中虛右
與左爲俞張壽焉平生製作甚多少留稿今所存者
詩文若干卷并奏議數通而已銘曰

公之爲人温温克克公之處世飈飈颯颯公之立朝
蹇蹇諤諤公之居家澄澄澈澈公之政望轟轟烈烈
公之進退斬斬截截嗚呼君子取人先觀大節我銘
公墓千載不滅

劉母朱氏墓誌銘

世人之於父母類以得沐 聖朝褒封之榮為足以
報其罔極之恩人亦以是稱為令子也然此亦國家
待士之常禮耳父母未必皆賢但有貴子則可以得
之於子子亦未必皆賢但有年勞則可以及其親若
莆田劉母朱氏者有子四人皆不貴長閔好學師古
以孝友篤實稱鄉邦凡莆仙士大夫與之友者無不
登堂拜母部使按部必先禮其廬致俸廩以助養提
學周公羅公尤加敬重郡守王公二守朱君為建學
館迎致其中朝夕共餽如養母然卒之日闔郡邑兩

泮僚屬親臨賻殮為文以奠之有母儀婦道女中之
師之句發引又偕送出郭門之外士夫縞素相屬於
途遠近觀者嘖嘖嘆羨以為榮蓋莆中不世之盛事
也夫朱氏一孤孀閔一韋布耳畧無一毫勢力足以
動人而其生榮死哀視魯曼 褒封之榮者或不能
及是豈獨閔之賢所致而母之賢亦從可知矣按狀
母姓朱字季貞莆水南之塔麓人考士季妣林氏
封南京禮科給事中韓仲公之從女弟也幼敏悟過
人七歲能紉綴衣裳自是女紅粗細皆極工巧聞人

子齋素可以祈親永命即絕葷腥及笄父母力勸迺止父母有疾即不食日夜侍養未嘗就寢及卒哭幾喪明且致心疾服飾去鮮麗年二十歸劉為晦齋先生配晦齋蚤失怙恃筑筑孤立門戶艱棘朱氏為治內壘修頽葺廢稍得自存歲時相晦齋饋祀祖先必誠必敬撫諸孤從子女如已出叔父母居城中時迎養于家如事舅姑遇族黨尊幼恩禮有差無不得其歡心年三十有六晦齋謝世子女皆幼亦有在胎中者庖無越宿之儲門無五尺之童與功總強近之親

獨力治喪一於禮不苟衣食於紡績恒達旦不眠女稍長教以婉婉女儀迨嫁教以婦道男稍長遣就外傳夜歸課其業且誨以人倫大義勤儉立家嘗曰吾聞汝祖忠信孝友見重鄉閭祖母刲股減年以祈親壽汝父念及即流涕不已汝曹可不效之乎撫諸子自孩提至婚娶衣食均一有異出者人不之覺其子亦不自知諸孫亦然或少有過差則叱撻之不少貸成化丙申以故居鬧市恐奪家教遂謀子閱遷諸近村先建祠堂以奉先世神主歲時旦望率子婦拜謁

如禮有所薦祭必先期營辦稱家有無務極精潔少
不如意則終日鬱鬱不安待諸婦慈而有則畜婢僕
嚴而不苛婦有過姑教之不改然後叱之笞之又不
改將繼之以出家甚貧合諸子婦贄修紡績而節縮
之隣里有急雖升合必相周朱之母儀婦道大率類
此宋蔡忠惠知制誥仁宗嘉之曰有子如此其母之
賢可知蘇文忠母讀范滂傳文忠曰某若為滂夫人
許之乎母曰汝若為滂吾顧不能為滂母耶然則二
子之賢由母之教乎抑二母之名由子之顯乎以予

觀之朱之母子殆不多讓也母生於永樂甲午四月
二十有七日卒於弘治辛亥八月二十有九日享年
七十有八子男四長即閔次閔闡庶出授徒于鄉闡
平海衛庠生先卒女三長適國子學錄黃英次適朱
祐季庶出適余淮孫男六大繼大佐大興大美大齊
大睦大全孫女七曾孫男三自新自遷自警孫女二
墓在與福里之東山一名象峰坐癸向丁凡七窆西
上其一閔之祖考兆二府君其二祖妣李氏三則考
晦齋府君皆成化癸卯春正月十五日葬也四則今

葬朱氏實卒之年十一月二十四日也五爲閩閩所
生之母俞氏壽藏其六與七則祖媿李氏與伯妣李
氏葬焉其地斗南鄭廷綱義叻也銘曰

柔而剛靜而方美含章坤道常劉之孀惠且莊訓兒
郎登寶堂人云亡名愈芳

伍母李夫人墓表

蜀之棠邑有處士伍君諱謙者以隱德爲鄉善人邑
之宦族李氏女年十八歸處士爲冢婦時處士之祖
父父皆在堂祖母年高無齒不能粒食李氏每晨登

堂拜太舅若舅畢即入北堂問太姑安否解衿乳之
如是日數次不替寒暑太姑數十年不聞穀氣而肌
膚潤澤起居強健若少婦然每乳必引李氏衣祝之
曰我之殘年汝所與也德之厚者報必大汝之子孫
當有顯者壽百歲而終後李氏果生丈夫子三人長
從政次從教次從敬處士謝世諸孤皆未成立從敬
尚在襁抱家無擔石之儲李氏年方三十矢志孀居
勤儉立家刻意教子景泰癸酉從教遂領鄉薦而起
掌教陝之乾崖從政從敬且耕且讀每遇李氏設悅

之晨兄弟齋沐告天以祝其壽李氏年九十四無恙而逝從政一子福從教一子詔從敬三子長性中成化戊戌曾彥榜進士歷某州知州擢浙江按察司僉憲奉勅提督兩浙蘇松水利次方次詔與詔俱備邑庠弟子員貴顯有日性之長子某亦然餘若孫皆巋岌可望太姑所以祝李氏者已見於今日矣往歲予提學兩浙與性為同僚性泣語予曰某早喪母非祖母李氏無以至今日今李氏沒已若干年墓石未表敢以累大筆予以孝者仁之發施於父母為孝子於舅姑為孝婦然世之所謂孝婦者能養其舅姑足矣况及其太姑乎能養足矣况養以身之膏血乎夫孝而不愛其身則其孝無所不至矣噫李氏雖賢不過一婦人耳其居處不出閨門見聞不及隣里無師友之講明與名教之責望且於舅之屬又因其夫非始生而有也乃能致其孝養如是其於世教不亦重乎故表而出之

中奉大夫湖廣左布政使嚴公墓表

公姓嚴諱淦字宗源別號鈍菴世居莆城烏石山下

曾大父以姚姓贅嚴因戎嚴籍後公欲復姚姓以戎
例拘不果公生七歲喪母十八歲喪父兄弟三人稍
長者二人俱蚤世獨公最幼公年十五補郡庠生父
歿當繼伍衛帥奇之不忍奪其志伍其他丁公得益
肆志於學正統丁卯領福建鄉闈書經三魁戊辰會
試乙榜不就卒業太學時憲友柯公孟時亦以家貧
奮起戎中一見公喜曰吾得良友也遂相與勵志勤
苦文章行檢俱以古人自期待不安小成大學季魁
二公居多由是莆田文物愈重海內景泰辛未柯公

以 殿元官翰林甲戌公繼之登孫賢榜進士亦改
庶吉士入翰林預修寰宇志有銀幣之 賜丙子拜
江西道監察御史未幾繼母林氏歿守制于家己卯
服闋改道雲南奉 勅提學南畿下車嚴教條肅士
習考校必先德行文詞必根理趣請託不通拳豪之
門雖多謗憾而江之東士風文氣實爲一變蘇松常
鎮畿內頡頏郡也而鎮士每不齒於三郡公嘗至鎮
今少詹事兼翰林院侍讀費君廷言時以貢起公視
其器宇不凡試其文又如之廼寢其貢且獎以奪魁

衆皆駭訝是年果領京闈而起會試遂魁天下今鎮
士得與三郡齒者公之與也丁亥陞浙江按察司副
使仍督畿學甫半載以不便行事改湖廣奉勅撫
流民將三載又改勅提學然於政教之施視南畿
則稍濟以寬湖士安之蒲九載陞廣東按察使有賊
首王黎檢等烏合二百餘衆嘯聚後山去廣城不兩
舍村市震懼公設策擒之黎檢誣仇者繫逮四十人
公辯而釋之未幾有王豆皮等復據黎檢故巢聲勢
過之公給募帖俘其首賞銀十兩從半之不數日巢

無噍類三府重臣皆致禮為公慶庚子陞湖廣右布
政使湖民舉首加額曰吾舊父母復來也凡有施設
不令而行未幾荆襄缺巡撫大臣內外守土官合薦
公未報公因督修江隄過勞成疾竟不起數日左布
政之命下而公不及見矣惜哉公賦性嚴毅蒞事精
勤置身於禮法中自布衣至極品動履不差尺寸遇
人一於誠心不苟合人先來加禮者報之必隆唯恐
後或少忽之者報必欲稱亦不必貸作字雖忙備紙
墨必精佳在家庭不冠不坐言動矜持居官謹守法

律毫髮不貳初至廣指揮張淮逮獄議斬公覈之庶
立功先議者嚙之公曰豈可以人之性命悅人也及
公遷湖淮竅于途酬以珍寶公峻拒之曰吾知有法
而已豈為汝也公與人雖不苟合然於故人情分甚
篤兗州通判陳君汝玉與殿元公皆太學同志者二
人先歿公每語及必流涕先輩曾景修以書經倡甫
教授德安父子繼歿官所僅一孫隨母改適德人家
鄉皆莫之知公曰此吾私淑師也物得之資其歸以
奉曾祀公歷官中外三十餘年卒之日囊如懸磬其
學行政迹則各著于所在固不表而彰也子恭慮世
遠而不聞其詳故請予表之

行狀

奉議大夫南京太常寺卿愧齋陳公行狀

公莆涵江人姓陳諱音字師召行孜七別號愧齋先
世出胡公之後宋明州觀察使淬與其子仲剛俱死
靖康之難詔旌其里居曰忠孝坊者公涵江之祖也
曾祖宗義祖光遠俱不仕父崇澄號耕樂以公貴累
贈南京太常少卿母黃氏累贈恭人公自幼穎異既

長補邑庠生都憲牟公倬為閩憲僉時試之見所作文字大驚曰此豈但科目耶遂不以弟子禮臨之天順壬午領福建鄉薦癸未秋中會試正榜甲申登彭教榜進士改翰林院庶吉士讀書中祕成化乙酉授本院編修丁亥八月預修

英宗皇帝實錄成陞從六品俸賜白金文綺戊子編修初考推恩 贈耕樂公如其官黃氏為孺人庚寅上時政十數事皆關國家大體壬辰以久曠丘隴告歸省甲午復任丙申二月陞本院侍講并陞加俸隨

簡入 經筵辛丑禮部會試同考所取士至今稱為得人時中貴之有力者之母死公卿咸赴弔公獨曰吾素無相識不往又有某姓者恃 寵驕縱廷臣福威在其掌握中一日私遣爪牙捕中書舍人楊某并拷辱其妻公與楊隣居聞之登墉大呵曰汝何人非奉 朝旨敢擅辱京職其人反詰曰汝何人敢不畏東廠答曰我翰林侍講陳音也恐傷國家元氣聞者謂公素温厚今廼能如是仁者必有勇信夫癸卯三月吏部以南京太常寺缺少卿欲得謹厚文學儒臣

補之廷議推公 上可之公自履任以來凡遇歲時
薦享該本寺掌行者 孝陵必越宿出郊先百官率
屬以共職帝王功臣諸廟則夜初分而往雖大雨雪
無後期文廟之祭或公主之必具服端坐俟過子刻
乃行不丙其丁也郊廟之禮雖南都不舉而值洒掃
曬亮之期必躬臨督屬務極乾潔不敢慢至如梅筭
梨橙諸新品該差人馳薦 太廟者必通選屬官之
勤慎者付之不至褻誤所屬如協律贊禮司樂知觀
等職該本寺考選諳習無過者具名銜以待銓注公

悉秉至公吏部無駁易者公居頽圯飾以俸入右廂
隙地結茆爲亭名曰清風自爲文記之亭前牡丹數
本每歲盛開選客賦詩歡賞終日後同僚沈君廷美
至遂讓以與之自移居于左傍別結臺榭亦如之已
而南京翰林院缺長官內閣具題 命公兼掌院事
自後凡南京吏禮二部有缺卿亞物議多歸之其僚
屬私相祝曰願 朝廷毋愍我公壬子八月少卿九
年秩滿吏部欲他擢重遠所屬意仍卿公本寺前此
公奏績未回二子舉華同領閩藩鄉薦及公至二子

偕計亦至南都內外守備重臣暨府部而下諸公卿趨慶盈門鄉人職役于茲及都下慕公名者聯帛綴綵以為賀恒填巷陌公賦性醇厚處世坦易無他腸與人交一於誠意不立邊幅人皆樂為公傾倒或有犯之者亦不與校唯曰也罷故士夫間皆以也罷先生稱之其在翰林如今宗伯舜咨曰川尚矩學士賓之祭酒鳴治明仲諸先生直廬史館無頃刻相離凡讌集論談公不預則不能成權今在南都無旬月不通訊候海內士大夫以公識與不識為重輕處同僚

前則牛君大經今則廷美人稱為異姓兄弟遇幕屬如子姪至於尉隸之賤亦未嘗加以惡言族人到官邸者踈戚恩意有差皆極其懽好無失鄉人雖流品之賤亦接遇以禮或有急難亦必隨力為之拯解蚤年四方來從學者堂室不相容至更番而晉公因材成就人人各有所得今兩京如太常卿齊章而下執弟子禮者不下數十人各省藩臬郡縣又難屈指焉今雖不設講而舊徒仕于內外者薄物必獻歲時介使常滿庭公初簡入內書堂教書從遊幼宦今亦有

職守南都者咸事公以父禮公爲文不甚構思信筆
立成四方求請無虛日公應之且無後期與人交際
禮意厚薄或疑所施公必從其厚故人之報公也亦
厚疾革守備太監陳蔣二公爭爲需材值近百金酬
之不受鄉人并屬吏相率請禱北辰祈延歲壽皆出
誠心蓋公醇厚之德入人之深類如此公生於正統
丙辰三月十有七日卒于弘治甲寅六月二十有二
日享年五十有九娶黃氏翰林檢討約仲之曾孫女
鄉貢進士孟益之子善鳴女也累贈恭人繼娶林氏
貴州按察使坦之從子某之女也兄弟二人公居長
鄉貢進士員其次也子男二長卽舉黃出娶某氏次
卽華林出予女夫也女亦二長適太子太傅戶部尙
書翁世資之男洪次適貴州按察使卓天錫之男某
孫男五須孝須友須政須某舉子也須禮華子也孫
女幾葬期墓地待請 命于朝而後定茲將發引歸
于正寢先次其行蹟大都請立言君子采錄爲銘

傳

蘇子興傳

子興姓蘇名廣應天府上元縣鳳城鄉中保三圖人
出都城通濟門四十五里曰雄花鎮其居也蚤喪父
家貧別無生業母某氏年老子興俾弟慶居家侍養
自傭役於官受值以給之因版圖以其屬長子興為
戶故公門中皆呼為蘇子興弘治辛亥予改官南都
子興適在傭執役謹憇予愛之去年春奏績上京令
其視裝子興心以母老不欲往亦不敢自白遂矢志
素餐為母祈安母晚歲多疾子興每求假歸省不敢
越期出門且行且號將入城廼止予尋得狀假多寬

期去冬母邁腫疾醫巫禱治弗効人或告之曰割股
可以療疾子興復求假密市一小匕首而歸是夜沐
浴焚香拜告天地露左臂令弟慶拾起其肉高寸許
自以匕首斷之血噴弟面驚仆于地移時方蘇子興
遂以其肉細切和米煮粥天明捧以食母母水漿不
入口已旬日粥至強起啜數口曰此粥何香滑如是
頗可吾口遂盡所有越二日腫漸消子興臂瘡未合
偈假期復來不欲人知其故同起居者覺其運臂不
類平昔強誥之始知少宗伯圭峯董先生聞召至官

邸視其臂爲之辛酸呼子孫家衆觀之錫以白金饌
食予遣其奉歸共母以彰尊賜子興到家母疾十已
去七八一日偶思食鷄卵子興趨入城貸市未獲其
夜風雨驟至忽一牝雞趨入臥內若有驅之者然子
興喜且訝遂訪叩同室內外無覓雞者廼畜之連得
卵十數餘持歸食母疾去殆盡子興以瘡故又驅馳
勞瘁因而成疾予使鑿治之鑿曰汝胃虛宜以肉補
子興曰吾方為母齋素不敢奉教弟慶來視對哭移
時及歸戒之曰慎勿令母知吾疾也又二日弟慶復
來道母疾已平復子興之疾亦併脫去矣子興年旣
長人勸其娶妻謝曰吾奔走之人勤勞所得僅足供
母若移是以娶妻如母何茲者鄰媪聞其孝以女與
之慶年方十八歲嘗為母煮粥母嗔其失時不食慶
號終日亦不食人謂其可為子興之弟也

論曰子興村巷一細民耳不事詩書不識名譽且貧
窮不能自存而孝親至於如是天亦每報應之如影
響世之膏粱子弟談經飾美視父母如途人不知見
子興當何如耶嗚呼是豈子興之資稟與人殊也蓋

人性皆善利欲害之子興殆以貧且拙而全其天乎

東園文集卷十三

十三

東園鄭先生文集續卷之十二終

且世而全其天乎

東園鄭先生文集續編卷之十二

祝文

梁山祈雨祝文

天地者萬物之父母山川者天地之輔弼天地包括
乎萬方山川鎮定乎一境若夫雨暘時若陰陽敘順
品物流形萬物化生是固天地發育之功實乃山川
輔相之力其或氣化閉塞雨澤愆期者不萌甲者不
折是雖天地之大不能不憾於人唯爾山川之神豈
能辭其責耶粵茲仙遊古號有年之邑唯我歸德又

大夏國卷之三

一

號有年之鄉夫何今年已未始于仲夏爰歷仲秋片
雲不作點雨莫施山童澤龜沙煎石爛苗方秀者色
變而黃穗欲吐者胎枯而縮形容憔悴似求活於片
時根葉燥焦唯可供乎一火農夫始則輪更守護爭
汲乎微涪今則袖手相看拋棄為荒野靡神不舉靡
愛斯牲師巫而造歌哭而請胡天冥冥曾無一應職
其所由豈達官耆老不能率先於鄉閭乎抑里正保甲
未免陵轍於孤寡乎豈閭左少年之不檢乎抑強宗
豪右之橫逆乎豈帷幕之不脩乎抑簞蓋之不歸乎

豈權門之請託太勤乎抑公家之漁獵太甚乎凡此
灾咎宜加其身豈可淫威徧加羣動紀生於斯長於
斯偶奉 國恩歸掃于茲閔雲漢之子遺脩荒政之
有自欲曝厓也疑於暴欲焚巫也近於疏其能潤澤
百里觸石而出膚寸而合者唯我梁山之神乎用是
紀等謹率群黎百姓就於建興道場齋素三日上禱
于神唯神體天地好生之心續萬民垂絕之命會鳳頂
仙臺之英靈集龍潭烏池之精脉一嘘一吸雲烟蔽
野一歧一動雷電轟天月離于箕風揚沙天唯爾有
神為我箕之月離于畢俾滂沱矣維爾有神為我畢之
戒鼓駭衆我不駭也聞龍不覲我則覲也驟不崇朝黃
可青也徐則入土焦可潤也爭汲者報賽而登場哭歌者
含哺而鼓腹春秋書有年金滕載大熟古跡重興功載
不績紀等將立石頌德上達 聖朝牲帛祝號將與五
岳四瀆並享祀典於無窮天唯爾有神尚其懋建厥
職無作神羞

上梁文

御書閣上梁文 屏山

伏以五倫莫大於君親百行莫先於忠孝恭惟紀末
學微才遭逢盛世階銜榮列于六卿 誥軸兼隆乎
三代金章玉璽壯西漢之雄文鳳縠鸞紋昭 大明
之盛典傳家至寶曠世殊恩旣匪匣之珍藏宜樓臺
之壯麗美輪奐與擁家廟以朝陽斯翼斯暈附影堂
而拱北元首股肱之際會門庭閭里之光輝日吉時
良賓嘉宴美謹呈小頌同舉高梁

拋梁東複閣層樓曉日紅三品階銜 皇帝制一家
恩寵祖孫同

東園文集卷十三

三

拋梁西危樓高與紫雲齊豈但一門添盛事八閩翹
首望仙溪

拋梁南一門三世 聖恩覃古來忠孝男兒事留與
莆陽作美談

拋梁北仙溪人建 御書閣問渠何事 寵恩重道
是先公多種德

拋梁上屏山巍峩高萬丈 天顏咫尺霄漢中百世
兒孫爭拱向

拋梁下 聖製宸章照華夏欵昭 君寵報親恩豈

為東園重聲價

伏願上梁之後南湖宗派喬木孫枝德與日俱新學
與年並進潤身謀道振振乎仁厚之風保族睦隣藹
藹乎敦龐之俗監愚民逐利爭田之巧智思爾祖愛
人濟物之良心強拔禍根廣滋德種青雲接武黃甲
聯名享富貴與國咸休保家門極天罔墜

王音樓上梁文

伏以陽鳳淮龍 真主正九重而疑命洛龜河馬宸
章霈萬國以同春鍾阜 帝鄉金陵王氣留都民部

東園文集卷三

四

乃東南財賦所鍾 聖世王言實生靈命脉攸繫紫
泥封啓綠野恩覃百尺危簷摩雲霄之彩鳳半空禳
道峙殿闕之青龍綸渙自天音聞如玉禹謨舜典補
秘書閣未備之詞章殷禮周文衍皇極疇重敷之德
澤乾父坤母地厚天高共職南都沐 累朝恩波之
浩蕩翹頭北闕瞻 列空道德之光華日吉時良功
成事集徵詞一祝 聖壽萬年

拋梁東傑閣層樓映日紅 聖世恩波深似海華夷

一統沐春風

拋梁西樓閣崢嶸天覺低

鳳詔龍章春浩蕩高呼

華祝萬方齊

拋梁南

御墨宸章正作函國計不虧民食足江南

共沐

聖恩覃

拋梁北百八高樓依

帝闕中藏

聖世皇極書蒼

生萬姓霑

恩澤

拋梁上新築樓臺高千丈

御墨淋漓雲漢間水天

見此應相讓

拋梁下一代

宸章涵萬化危樓高閣與雲齊南都

從此增聲價

伏願上梁之後

皇恩天降

聖德日新君明臣良

時清國泰民田不歸於戚里國計少入於宮幃錢諸

免內庫之增收兵甲致外夷之遠服南都根本百世

敷榮北闕山河千年鞏固雖官階之有隲願祝頌於

無疆

祭文

祭太常御愧齋陳先生音文

人孰不生德足潤身名能稱情則生不徒生也人孰

不死學淑英髦澤流孫子雖死猶不死也維公早從
塾師已稱白眉長錄泮庠聲問四馳壬午鄉薦頭角
始見癸未會闈傳臚金殿既登甲第進學中祕涵養
陶鎔遂成大器列銜纂脩玉署遨遊 芸皇進祿金
帛寵優遂步花墀日侍講筵敷陳聖學格沃淵淵禮
闈葩經聘司文衡陶沙下璞一網羣英南都寅直闕
人共職廼貳奉常以崇厥秩 陛辭而南典禮是耽
兩壇十廟歷載三三朝天于邁清卿大拜老成練達
夙夜匪懈維嶽降神生甫及申壺山間氣今屬何人

公之器局泰山喬岳公之德性良金美玉公為文詞
若不構思連篇累牘半尾繭絲公之問學天高海闊
萬理昭融活活潑潑公之燕居怡怡愉愉不矜不肆
天真自如公之色履不愠不喜渾然之中有條有理
公之行藏外圓內方一臨利害于夫莫當公之父母
荐膺 帝祉焚黃高阡重纓疊組公之兄弟如鴻如
鷁傳衣拜命聯步登瀛公之教子飽經厭史鄉榜聯
名觀光 帝里公之接人陽和津津禮賢下士恤匱
周貧公之睦族恩愛彌篤踈戚有差悉沾餘祿公之

傳經海內髦英宦途邂逅半其陶成嗚呼天之賦公也何備其效公也何亟壽不滿乎六旬名可傳於百世

祭工部侍郎黃公孔昭文

維公之先黃岩故族天之生公因材而篤少游泮林早登科第爰列清班荐躋要地人謂銓衡利拳臺鑿公居十載門可羅雀人謂邦土布泉藪淵公將兩考囊如罄懸先公職方褒親莫及公拜龍章三世同秩先公聽事僅足旋馬公官兩京不添一瓦公僅一子

其溫如玉十年甲科兩官部屬公之諸孫岌岌嶷嶷重闡百歲紹此裘箕嗚呼圓方相函萬化參錯理無完虧氣有厚薄公於報國甚周謀身多缺奉先榮顯安居陋劣唯誨兒孫既賢且哲是公於理之所有者強探力求分之所限者戒盈守拙蓋公之所能者人所不能者天然 皇恩諭祭顯官卜千百世之下永賚重泉嗚呼生榮死哀裕後光前人或不能於其一而公獨享其全是乃天人相與之妙夫豈偶然耶

祭秦京兆文

東充名族也累葉青瓊廟祀雷土也世澤綿綿君登
科甲也列職諫垣獻納黼宸也幾千萬言指奸摘佞
也班行聳肩出掌馬政也勤勞塞淵騏驎億兆也駱
牝三千 帝簡在哀也光祿南遷黃封內法也賜宴
經筵天庖奏玉也 皇祖歆然本根重地也京兆闕
負 帝顧廷臣也莫或汝先曰玆赤子也汝其惠鮮
君初拜命也多方訪延法便於民也循途不遷一有
疲弊也易調改絃振振麟趾諤諤鷹鷂吐氣也孱弱
飲跡也豪權人或不見知也謂君踈畧倨傲法網或
愆其或見知也謂君簡直質朴多方少圓嗚呼知與
不知也孰真孰譏取人於後代也曷求其全君歷三
卿也二十餘年今日發囊也袴弊裘穿是蓋君不買
生前之譽也而貽以身後之賢

祭默軒楊先生瓚文

公以莆彥著錄仙庠先兄實齋交誼深長紀自髫髻
樞趨門牆觀瀾學海極目汪洋公唯庚午擢秀文場
倚廬三載授我大方幸逢癸酉叨觀國光公唯丁丑
遭遇 英皇大庭獨對天卿正即百僚仰式庶職提

網庚辰瓊宴紀竊餘芳追隨官邸啓發精詳游我道
藝沃我文章紀因親老乞告還鄉公遂大拜參政省
堂甘棠河洛霖雨湖湘方承 帝簡置于廟廊公遂
引疾壺山之陽伯墳仲篋一味一觴兒孫繞膝雲路
書香齊眉伉儷鳳誥龍章破除利扭揮脫名韉琴書
適興泉石徜徉結亭浦嶼曳杖林塘城市無跡榮辱
兩忘鄉邦著蔡家國禎祥紀幸歸掃筐贄微將再霑
雨化大破茅荒胡別未幾二豎猖狂遠聞凶訃擗踊
傍徨涕泗如雨霑襟濡袞薄陳牲醴寫我哀腸公不
我棄憐茲慘傷

二東園文集卷十三

九

祭蔡母文

靈之生兮粹天質服母訓兮良自飭居深閨兮重金
璧歸名門兮宜家室婦之儀兮姑之則淒之窺兮母
之式薦蘋蘩兮助宗室驅脂鈇兮歸紡績相夫君兮
揚清德教賢兒兮奮鵬翮胡天年兮不滿百蟠桃瘁
兮珞池竭浮山寂寂兮暮雲黑萱草淒淒兮鎖秋色
我與賢兒兮重契結聞凶訃兮腸欲裂酒一觴兮奠

幽宅靈有知兮其來格

雜著

仙夢辯

邑之東北有山曰九仙山湖曰鯉湖俗謂臨川何氏九子尋煉山中丹成乘鯉升仙而得名也其翁與媪跡至於昴見而逝土人異而祠之凡祈禱多應有女適張適楊適范適信亦因而血食焉范為尤顯稱曰范侯今湖之上有閣像翁於其中九仙列其前范侯侍其側邑人有疑則刑牲東楮密疏于范范則報群仙以授所丐者寐後蛟于范以質虛實退乃述所

夢與守祠者開發其祕多有應者然其間亦嘗附會遷就以助其靈者十恒七八由莆而閩而天下靡不聞風而翹想之士大夫遊宦茲土莫不函疏叩關而至皆以是夢何仙為主而范侯為使也予曰不然人之一身精神氣流不息日之發用則為事夜不應事則遊逸而為夢夜之所夢不過日用之事耳周禮六夢有正夢有思夢正夢謂安靜而夢思夢謂寤思所想而夢是祠在萬山之中一塵不到泉聲樹色毛骨生寒雖搔擾之人經越信宿亦自神清氣定和

妄不生且其巧功名則心主功名巧壽數則心主壽
數巧男嗣衣食則心主男嗣衣食以專主之心入靜
定之境則兼周禮所謂正與思者也物我一理朕兆
感通而吉凶悔吝豈有不前知也哉今人平居無事
之時其夢若有應驗者亦此理之形見爾果孰傳而
孰授之耶不然黃帝夢風后高宗夢傳說皆錙銖不
爽抑嘗到此山中而見所謂何范者耶故為說以辯
之

家譜引

東園文集卷十三

士

渾沌之初天地定位上下摩盪氣化而生萬物是天
地乃萬物之父母也物既成形各以氣類交感而形
化生矣形化之後各父其父各子其子各孫其孫千
枝萬派勢不可混而無別古先聖王迺賜姓命氏以
別其族如虞之姚夏之姒商之子周之姬之類姬之
後又別為鄭為魯為衛不一而足然推原其始則皆
黃帝之後而為厥初生民者之子孫也蓋初之別姓
以種類之夥親疎無別則恩愛混於所施恐厚其所
薄而薄其所厚仇怨攻爭由是而起其意亦甚善也

後世別之既久遂隔骸膜而分爾汝賢者知有父子
有兄弟以至堂從功總之間恩愛流通有差無間不
肖者知有父子兄弟而已至於堂從功總之親則相
視如塗人焉其又甚者父子兄弟之間亦皆相仇讐
况堂從乎此則分別既久之弊而近世賢士君子譜
圖之所由作也夫先王賜姓一本之散於萬殊也近
世譜圖萬殊之歸於一本也其實皆欲保全恩愛於
無窮焉吾鄭受姓始于周桓公之新鄭至梁陳間露
莊淑三公始著姓于莆三邑之鄭宗之屏山舊譜始

於祕書公至

國朝正統十四年厄於兵燹故今新

譜則以三秀為始而譜之為第一代焉三秀公而下

贈南京戶部右侍郎清泉公為再世封翰林院檢討

累贈南京戶部右侍郎松庵公為三世自此而下十

世以至百世之遠皆由此而系是三秀為一本而萬

殊百世之後又萬殊而一本此屏山新譜之大畧也

然今日在吾新譜者親未盡服未窮如蘇氏譜亭記

之所謂斯人固未宜有百世之後寧保其終無耶使

今日之譜常修而不廢則子孫歲時聚會閱而指曰

某公某公之子某公某公之孫某其兄弟也某其從兄弟也某其再從三從兄弟也某其族兄弟也千枝萬派其始皆一人之身皆三秀之遺躄也顧盼之頃孝友之念油然而生借有如斯之人亦何以自立於其間哉嗚呼譜法之繫人其重矣乎吾族之中自茲以往豈無一二人之賢者乎賢者當以譜責為己任毋甘自棄以勵族人可也於是乎書

訓彛山鄉學子弟

古者師之所以教弟子之所以學方其少時必先之

以洒掃應對進退之節以收其放心繼之以事親敬長入孝出恭之禮以培其根本然後詩書六藝之文以輔翼潤澤之是童丱之日涵養有素而聖賢之胚胎已具及其既長乃教以格致誠正修齊治平之道所以進之於充實之美光輝之大以收其成功而記誦詞章之學不與焉逮其德成名顯如尹之起莘說之肖巖呂之載渭風虎雲龍氣類交感而成不世之業固有由也西漢去古未遠猶有孝弟孝廉之科鄉舉里選之法故士習雖襍霸術然亦未至全離其真

也唐宋以來以明經進士博學宏詞設科以鎖院命題糊名易書立法於是唯瀛洛闕閩諸儒得不傳之緒非科目所能累其他白首窮經埋頭蠹簡於收培涵養之教耳不及聞幸而捷巍科躋顯位則自以為英邁蓋世人莫已若嗚呼諸生平日立言皆欲以聖賢自期待於此宜必知所擇矣

歸田各目

民之有生均稟同賦而氣習之拘亦或有不齊者所以上古聖神繼天立極我列聖法

皇朝文集卷十二

十四

古設官無非欲防其太過引其不及以歸於中道而已此國家臣子不問居位去位皆不得不任其責也紀嚮歸掃時見吾莆禮俗大不古若心竊憫之今去祭掃時又六七年適致政還鄉著歸田咨目十條以自警兼以訓子孫以告鄉人非敢任移風易俗之責但不欲助其縱侈耳倘有憐我老境無日勿破此戒俾得優游林下數年為淨鬼入地足矣

一嚮歸掃時只不作本處司府縣之書今并兩京中

外之書俱不作也

一餽送往復之禮人情不能無也但近時吾莆大家
留飲則五鳳卓面餽送則羊酒盤盒非惟競鬪奢
侈抑或預投物餌奢侈則壞禮俗投餌則傷名節
不可不預為之處今紀到家之日諸親友係本房
兒女親家則賀禮四事餘親只二事鄉里近者一
事遠者只果酌以敘鄉情而已邀請不用開卓食
物不過魚肉三四味過則例一定固却

一自家留客鮮鹹魚肉不過三味蔬菜不拘果品因
家中所有不用粘疊高聳酒不過五行七行而止
飲量以杯爵大小為度不得擲色高歌日飲抵暮
亂性敗度莫過於此戒之戒之

一親朋往還談詩論禮者日來不厭若欲伸冤訴枉
求書囑事而先以禮物羅致者一定閉門不納

一田園廬舍不過足食安居而已若貪心不止雖季
氏石崇亦不滿其意也今故鄉田廬足共晚景若
子孫衆盛之日聽其自行恢拓決不作千年之計
若鄉間不明田地尤平日之所禁絕者免勞窺猷

一仕宦退處家鄉者正宜韜光養晦以保晚節子孫親戚平日或有憑藉與人尚氣角力者今當包羞忍恥以免災咎或有被人欺辱不必來告

一老年以禮致仕但遇慶祭鄉飲非疾必赴上官下顧者當面拜謝于家不必回拜郡邑大夫來者不賀去者不送若素相敬愛者詩文以代親友好事有以咨目中酒食相邀登臨無事于囑者非盛暑隆寒不却若酒食過豐不辭而歸

一作文賦詩儒者職業若達官大老德業隆盛人所共知者志銘表狀須與撰作其餘詩文有關世教者不拒但年老力恐不勝

一鄉邦吉凶禮節悉付諸子應酬老年難費精力有同時親故死亡必往弔哭

一冠婚喪祭一依文公家禮并國朝定制朔望家廟行禮上官貴客臨門須着有官服色若平時接見親友只用野服有故出入但用兩人肩輿衣匣行李挑而不扛不用在官隸卒里甲入夫

昔晦菴先生致仕欲以野服見客恐違俗為

人非議故咨目客位以自釋紀平日取信於
人者未如晦菴而違俗非止於野服一事此
歸田咨目之所由作也見者幸垂鑒察

東園先生文集附錄

名公敘述

公諱紀字廷綱別號東園登天順庚辰進士改翰林庶吉士授檢討歷官至戶部尚書致仕給驛還鄉奉詔進階榮祿大夫卒年七十有六賜葬諭祭二壇

幼莊重警敏趨向不凡與孝子劉閔居雲洞山中以居敬窮理為學一時名士翕然歸仰泉南陳剡夫來謁留閱月自言得見鄭子方覺荒踈修撰羅

附錄

倫謫官泉州往返必約於風亭僧舍講論數宿曰東園學問心得為多嘗倣周禮作義聚家範闔門千有餘指思義禮法藹然有章叅酌藍田鄉約舉朱子義倉提學周孟中梓其範僉事林克賢序刻約規通行八郡又救止買軍之害節省里役之費興造臥龍諸橋請復楓亭助役鄉人德之成化末朝旨促有司迫就道至武夷山復留晦翁精舍數月

還明年

朝促尤嚴起供職

孝宗登極上疏勸

御經筵近儒臣論聖學以正心

為要言甚切 上有這本所言朕當體行之旨課
士必先德行進退惟公雖當軸子弗庇召國子祭
酒 陛見司禮權璫陳寬見紀儀容修偉以鄉里
故求見却之附馬習禮稍愆召伏堂下不少貸再
入 經筵尤多啓迪一日講太甲中篇紀進曰人
心向背係君德之修否若任用忠良納誨輔德則
人愛戴若比昵近倖蠹政縱欲則人心叛離天命
去留亦因以異左右竦然 萬壽節舊規設醮禮
部取監生執事紀曰監生讀聖賢書豈識此禮上

附錄

二

疏極言設醮祝延之非不報 國學有膳餘銀千
兩典簿以常例奉紀曰膳為監生何與祭酒悉歸
諸官同官劉謂紀形其短屬監丞林大猷為言紀
曰非敢立異不忍白首而改節也○山東大旱嘗
上言人七日不食則死安能待應募之糴今江南
糧運閣淺山東乞量許截借俟募到銀兩糴還不
唯民饑得免於溝壑而船輕亦易達於京師深為
兩便并言太監羅兌新故遺貲鉅萬願無愛之以
救一方赤子復陳備荒六事 上皆嘉納又論古

祭禮天子九獻公卿降殺以兩今 郊廟止三獻
并言道家絕夫婦之禮優人亂男女之倫今乃使
之奉祭祀皆非所以興禮樂也。弘治丙辰 詔
舉將材疏上武舉事目甚詳謂武舉之科將材所
係請創制以補闕典今武舉科條多采用之庚申
邊儲告乏戶部咨取鹽引開中紀上言千里餽糧
士有饑色今渭南涼州一帶即古渭濱燉煌世代
不同地土則一實由軍容債帥吞併膏腴怯耕近
塞耳宜差官清理督種數年之後邊儲自足若以

附錄

三

見今缺乏則江南寺觀田連阡陌收其租稅量給
齋糧非惟裕邊賑濟之可資抑且崇正闢邪之有
漸事下戶部壬戌京師直隸大旱民多死徙因設
法令官軍月給就水次交兌凡三月積出餘米二
十餘萬石充賑先發後聞時全活甚衆司禮等監
民匠及送船餘丁紙鈔匠之類於舊制外歲增糧
米二十五萬餘石紀密疏奏革 上可之守備及
諸內臣不便至出危言紀不為動江西湖廣諸道
逋負累數百萬計民以運費倍於正糧為艱即奏

許折價他如鹽鈔布帛諸料凡解內庫者用費倍之皆奏令解部轉送每年所省數十萬。正德丙寅漳寇大作入我西鄙紀倡議築城明年城完寇再至不敢犯戊辰疾作都御史林俊孝子劉閔來視醫紀解之曰死生常理毋煩過念第受國厚恩每聞朝政變易為九京遺恨巡按御史韓廉暨守巡亦至偕郡邑大夫問疾紀語以僊城未固願卒事以惠一方卒之日正襟端坐占詩二律壽七十有六遺命劉閔治喪勿請葬祭。立朝正直剛毅遇事敢為無毫髮詭隨人意然用此數罹讒皆嘗誡其子曰富貴非可求徒喪所守余以孤忠自信雖爲人所讒賴

主上聖明殊恩荐及公道何負人耶

俱仙遊志

同考禮部會試有國甥在場 內廷遣賜茶餅同事因覓其卷甚急公置不發及錄進內多不悅

憲宗皇帝曰翰林官亦難為也。公器宇寬洪舉止

凝重雖在燕居必正襟端坐妻子奴隸未嘗見其惰容與人無貴賤一於誠作詩文無構思興到即

書終篇不易數字書法端嚴迥勁雖信筆亦字行
井井相對○先侍郎公沒公苦塊喪次日夜不離
三年之內未嘗一至後寢黃夫人非喪次不相見
蔬菜中偶有葷油輒覺而泣家人懼自是必整潔
以進服闋旬餘猶未忍改太夫人憐之親食以雞
因病瀉數日乃復常○督學浙江時哀詔至鎮巡
議鼓樂導迎公舉四海遏密八音之言以止之同
師生宿齋講禮終制以盡如喪之心

今上在東宮行冠禮公采古今帝王嘉言善行凡百

附錄

五

條各繪圖作贊名曰聖功圖表啓以進且言

皇太子當近正人聞正言不可與儂薄內侍遊

上優荅之一日東宮披圖翫視良久因指一圖諭

太子曰哥哥可學此人○公見留都無二年之儲辛

酉奏設水兌革濫支至癸亥秋京儲遂有七年之

積其水兌之法南京戶部至今遵行軍民甚以為

便○公自翰林至今官前後乞休一十八疏皆荷

溫旨免留弘治甲子三月復移病即官邸視事月餘

乃以本部印信咨送南京吏部委官署掌上疏懇

請束裝以待八月始奉有情詞懇切晉秩昇傳之
旨俱遺事

公自志學便以古八自期嘗與張東白羅一峰會
講性理與陳白沙以書翰相規勉又會于雲峒玩
易考禮主靜慎動以求至道聞人有善行雖微賤
必獎與之見人之貧賤非親密亦周恤之其崇正
輔仁之念終身不易家食二十餘年足不涉城府
上司非往拜其家不獲一見晚復著歸田咨目十
條○事親盡孝終喪不御酒肉不入房寢喪畢廬
墓讀書永世克思立朝處鄉多大功在在可紀是
皆載諸遺事人所共知可以名世而傳後者若夫
有欲為之志而於時於力有不逮者人未必盡知
也然其青天白日喬嶽太山則又昭昭不可掩者
矣

孝子劉閔撰遺事序

廷綱爲人梗直剛介有大抱負於古今人許可者
蓋少達官貴人雖平日相聞識未嘗肯一闖其門
所交好者必慎擇非其人亦不輕為荅問一語獨
與予泊同年南邑張君廷祥資其麗澤之益恒多

財一二日不相見即悵悵然如有失雖莫夜亦必
便服出一會會則講論五經性理之奧修身慎行
之方而詩文之工與否不屑論也至如彼此所行
有一善也則相與獎之有不善也則直詞規諫之
而不少貸如是者視以為常今年春廷綱以父母
年老久曠省侍乃援例乞致政不許六月復以養
親請 詔允之其致政養疾也予與廷祥皆懇懇
諭解之廷綱曰予非不此道之知第念雙親年老
思慕成疾二君所目見也今進則不能輸誠罄力
以忠于君徒碌碌日支於大官月給於太倉心果
安哉倘數年疾用少瘳報

國之日尚長於是予與廷祥謂其言亦一道也且古
人謂人之出處離朋友亦不可得而盡道之故不
復終止云

禮部尚書謝一夔撰逢瀛別意

廷綱遭逢 聖代乞告家居慨然有志於正家作

範若干條率家人力行且再世矣余近過其所居
竊有慕焉故取而壽梓以與有家君子共之於乎
天下之治正家為先天下之家正則天下治矣使

士夫之於家皆有先生之心其為風化之助豈小補哉

福建提學周孟中欽鄭氏家範

內翰鄭氏家範上有家長以統制乎一家自副長而下至於耕牧各以其職而聽命焉禮節明備亦一小周禮也雖然周禮主法制而仁厚之意貫乎其中鄭範主仁恩而禮制行於其內以予觀之禮易而範難也然鄭之子孫果能博學以明其理集義以正其身則亦未見其艱也嗚呼 國朝周禮惟鄭之子孫可行之

興化府知府前翰林岳正題鄭氏家範

附錄

八

東園先生曩自內翰乞侍養山中而以平日所蓄抱見聞者叅今考古彙錄一編已舉行之以淑一鄉而未及乎他郡予偶得之披閱再四觀其大書高祖舊章以提其綱於前細演先儒格言以詳其目於後無非欲吾民知制之不敢違與禮之不當違而尊信奉行之也克賢承

恩復官闕臬惟并坐此責是擢庸題諸篇端俾刻於列郡嘉與有官君子篤行之毋諉曰吾黨近迂而

空言無補也

福建僉事林克賢撰增修約序

余友廷綱先生退處山中逾二十載玩經察理洞
窺古昔聖神虛心應物無欲無爲之妙其充然自
得誠非流俗口耳辭章之學可論

福建提學新
俞胡榮撰

先生握文衡於浙之外臺所以授受者易詩書春
秋二禮之經所以宣明者君臣父子兄弟夫婦朋
友之道所以肄習者禮樂射御書數之文斷斷乎
如菽粟之必療饑藥石之必伐病異端邪說闢之
廓如也

芹泮留思

先生下車力以斯文爲己任教人以正心誠意之

八兩錦

九

學而以身先之厚本抑末斂華就實真道德之君
子也至如美教化易風俗興禮樂崇信義凡百事
有關於學政者皆振刷而一新之吾先生有功於
名教多矣

春風遺愛

浙俗不齊在東過儉西過奢且惑於浮屠和濤而
凡冠婚喪祭舉惟世俗是尚先王儀度十亡十八
先生蒞政之初深以爲憂乃躬親指教一以敦本
善俗爲先又命丁憂生員講習喪禮不爲異端所
惑自是兩浙士夫家居喪者多循家禮不修佛事

奢者禁儉者勉風俗漸為之變然其為人性剛法嚴直道而行不恤後事士受約束初甚苦久之乃

安士林遺思

先生教人先之以德行而孝弟是舉次之以文藝

而禮樂聿興開明道德造就人才復三代之隆於

百世之下自設提學以來未有如先生者矣化兩流香

數十年來士羈舉業俗尚異端聖賢禮義不明於

時故先生首崇德行黜不肖權豪寒素視之惟一

每至學必與諸生講正心誠意之學暇則及經世

制變大義是以志學之士感先生誨勤皆敏勉精

修以求不辱偷惰者則相顧駭愕以為厲已先生

亦未嘗以其自棄而棄之終焉翕然從以化者甚

多由是浙中學行之士彬彬輩出佛老積習斯遠

去矣禮部郎中門生商汝願撰

先生志圖歸養至終喪猶眷戀未即起蓋家居者

凡二十有二年其視利祿重輕漠然無所動於中

也久之以文行老成擢浙江提學副使 詔為國

子祭酒遷太常進今官文名德望巍然推重於時

附錄

而先生欲歸之志復置囂矣乃以奏績之京即具
疏乞休不允明日再疏以請優詔勉留始還任未
幾復有省墓之請乃許之苟非恬退之守堅定
有素能若是邪故世方競馳先生如遺世方推致
先生如避此其中豈功名宦達所能羈縻之也其
賢遠於人何如哉

吏部尚書倪岳撰歸省序

承平日久士大夫多養忠厚公獨以邁往之氣行
正大之學故用此取嫉於時然至於論天下正人
則不能捨之而他歸之也

戶部尚書周經撰

附錄

公少力學慷慨有大志事苟合義不以私利害動
其心澤可及民亦不必功歸於己其好賢樂善之
心雖古之君子無以過之

大學士張元禎撰

志向之高識見之敏治事之精明問學之粹雅在
朝之士或有能及其二者求其乃心忠愛於國
家大計未嘗一日少忘孰有如吾廷綱者哉然位
不竟才懇切求去至委印束裝以待命則其高風
峻節過人又遠矣

少師劉健送致仕序

公宅心甚剛毅負高識遠見夤出常流其淵源之

學經濟之才士林素所仰慕而崇重者方職檢討
時陳情歸養二十有餘載涵養益深及膺召還
朝歸然公輔之器具焉是以一董學政而兩浙士
風翕然還淳一教國子而師道以立一典太常而
禮樂章章復古比進貳司徒獨掌部事者彌久凡
處天下貢賦大率則在於節民財足國用汎掃其
宿蠹而已

南京吏部尚書林瀚撰致仕序

公通六經下筆數千言 憲皇 今上踐阼屢獻

嘉猷皆深切國家大計其董學政典成均教化大

天附錄

十一士

行士大夫能言之者多矣至於區處 國計澤無
及於兵民則予所目擊而身藉其功者也公茲歸
也而吾督府被堅執銳之士方戀戀焉不捨公亦
豈能恣然哉

魏國公徐備撰致仕序

公邑專秀任郡特隆如氣四備而日方中○氣完

際盛福壽考終後先鄉折屢孰為同

見素林俊祭文

維仙在宋有蔡忠惠旣以政顯亦以文著後三百

年公復崛起一邑二賢並美同譽○公有異學陋

彼締繪公有古道力挽頽漑公有宏才是曰經濟

近官於閩領公舊職仰視高風敢望萬一右都御史姚奠祭文

生平氣操潔白堅貞出處大節俊偉光明非特門生故吏誦公之德雖婦人賤隸亦莫不仰公之名閩中固為多賢之地求與公媲美者殆霜葉之與晨星福建布政王子言祭文

公年三十二即引疾歸養侍松菴翁林下甘旨必親翁樂善好施嘗因公貴焚券數千兩公先意承之泉南豪家殺人以千金屬翁翁曰甬知吾兒不可乃欲吾以是語兒麾使亟去公聞之益自砥礪

附錄

一七

嘗偕劉孝子閔學道雲峒公歸孝子數以手札問難公甫陳先生取而跋之今在白沙集○處貴顯以清約自持餘俸周恤不事生產及卒家無羨錢奇玩喪事僅足而已○君子謂其有匹休古人之行而世不能殫有經濟天下之才而時不盡用出處始終光明俊偉於富貴利達泊如也吾於公何

議哉翠渠周瑛撰行狀

讀東園先生奏議

有官守者因事進言不汎陳平治道有言責者遇事可言未能及於格心諏謀度詢得盡言於冕旒非侍臣則講官也是故召康公從遊卷阿矢馮翼孝德之謨程叔子職列經筵進養德育物之規我

朝定制翰林爲近侍之職 經筵列講讀之官學術宏深者釋疑解惑德容純粹者鎮蹀銷邪不必身任庶職而后可以言亦不必連篇

附錄

十四

累牘而后行其言也退而上章引君當道乃經筵之末務爾大治幼寓京師聞東園鄭公立朝行誼卓有古大臣風歷事

三朝再入 經筵啓沃功多凡禮樂刑政事關大體當理者必贊其決過中者必窺其謀一日講太甲中篇進而言曰人心向背係君德修否任用忠良納誨輔德則人心愛戴比昵近倖蠹政害民則人心叛離天命去留亦因以異言詞慷慨合殿改容此其彰彰明著者

也故當時凡因公勸進與所抑止者多矣其見於章疏則勢遠所尊不得已於言以究其將順匡救之道非炫已美以揚君過也故曰退而上章者經筵之末務爾公由館職至八座凡六任章奏凡幾上今存於家者僅十疏所言咸裨治道弘益民生聖功一圖預養君德上追三謨尤爲超卓近世輯宋儒章奏關乎政要者爲大儒大奏議如公之疏非所謂大奏議邪荀悅論有王主亦有王臣如公以

附錄

五

道事君立功興化非所謂王臣耶公賢嗣國子生主忠誠夫氏懼公手澤久而淪沒謹輯編之曰東園奏議乞休十九疏已著歸田錄不與焉公不負王主誠夫不負其父夫復何言大治讀公奏議恐人不知謂宦業止於斯也故述公格心之績以附于編若曰是足以知公矣則吾豈敢

嘉靖丁亥孟冬郡中後學橫塘彭大治謹識

